

# Empangan catat bacaan paling rendah

**KANGAR** - Paras air di Empangan Timah Tasoh semalam mencatat bacaan paling rendah setinggi 26.78 meter, menurun dua milimeter berbanding 26.8 meter, kelmarin.

Pengarah Jabatan Pengairan dan Saliran (JPS) Perlis, Ir Abdul Najib Abdullah berkata, paras itu terendah pernah dicatat sejak empangan itu beroperasi pada 1992. Paras kritikal adalah 25.0 meter.

“Paras air dicatat hari ini (semalam) lebih rendah daripada pernah berlaku pada 24 Julai 1998 setinggi 27.04 meter ketika fenomena El Nino melanda negara,” katanya.

El Nino adalah fenomena pemanasan suhu permukaan laut yang berlaku setiap tahun di timur Lautan Pasifik berhampiran luar pantai Peru.

Kejadian itu menyebabkan rantaian perubahan iklim di seluruh dunia yang membawa hujan lebat di sesetengah kawasan dan kemarau panjang di kawasan lain.

Abdul Najib berkata, cuaca panas dan kering berpanjangan di Perlis sejak Disember tahun lepas menyebabkan paras air di empangan itu menurun ke paras terendah.

“Situasi ini menyebabkan JPS terpaksa menangguk bekalan air untuk pengairan

sawah padi seluas lebih 3,000 hektar memabitkan lebih 6,000 petani yang menanam padi di luar musim sehingga Jun ini.

“Bekalan air untuk keperluan domestik bagaimanapun tidak terjejas sekurangnya untuk tempoh dua bulan lagi walaupun kemarau berterusan,” katanya.

Selain Empangan Timah Tasoh, beliau berkata, sebanyak 50 peratus sumber air Perlis adalah dari Sungai Arau yang menerima air dari Lembaga Kemajuan Pertanian Muda (Mada) Kedah.

Katanya, Empangan Timah Tasoh menyalurkan sebanyak 58,000 meter padu air sehari untuk kegunaan domestik dan kira-kira 532,000 meter padu lagi untuk tanaman padi di seluruh negeri.

Empangan Timah Tasoh seluas 13.3 kilometer persegi membekalkan hampir 50 peratus keperluan air negeri ini, meliputi kawasan utara Perlis termasuk Padang Besar dan Kangar dengan penduduk berjumlah lebih 100,000 orang.

Abdul Najib menasihatkan orang ramai supaya berjimat menggunakan air serta tidak mencemarkan punca air sama ada sungai atau kolam. - Bernama